

Kagame, Mpayimana na Habineza nibo bakandida ku mwanya wa PEREZIDA

Yashyizwe ku rubuga na [CHIEF EDITOR](#) Kuwa 07/07/2017

Komisiyo y'igihugu y'amatora imaze kwemeza ku buryo ntakuka Abakandida bazahatana ku mwanya w'umukuru w'igihugu mu matora yo mu kwezi gutaha. Paul Kagame, Philippe Mpayimana na Frank Habineza nibo bazahatana muri aya matora.



Paul Kagame, Philippe Mpayimana na Frank Habineza nibo bazahatana

Perezida wa Komisiyo y'igihugu y'amatora Prof Kalisa Mbanda mu minota micye yamaranye n'abanyamakuru yavuze ko Inama y'Abakomiseri ba Komisiyo y'amatora nyuma yo kwakira Abakandida batandatu (6) yasesenguye Kandidatire zabo n'ibiziherekeje.

Ati "Hashingiwe ku biteganwa n'ingingo ya 99 y'itegeko Nshinga ry'u Rwanda nk'uko ryavuguruwe mu 2015, n'ingingo ya 82 n'ya 83 z'itegeko ryo mu 2010 rigenga amatora,...inama y'abakomiseri itangarije Abanyarwanda ko Abakandida bemejwe burundu ari Habineza Frank watanzwe n'ishyamba Democratic Green Party of Rwanda, Mpayimana Philippe umukandida wigenga na Paul Kagame watanzwe n'Umuryango FPR-Inkotanyi."

Prof Mbanda yavuze ko abandi Bakandida batatu batemejwe ari uko batujuje ibiteganwa n'amategeko, abo ni Mwendata Gilbert utarujije imikono **600** isabwa kuko ngo afite **522**, kandi akaba nta mukono n'umwe wemewe yakuye mu Karere ka Burera kandi akaba yarashyize ku rutonde rw'abamusinyiye umuntu wapfuye.

Undi ni Barafinda Sekikubo Fred, nawe utarujije imikono **600** kuko ngo afite imikono **362**, kandi akaba adafite imikono 12 mu Turere **18**, kandi ntafite icyemezo cy'ubwengehugu bw'inkomoko nk'uko byavuzwe na Prof Mbanda.

Ati “Undi utaremejwe ni Madamazera Rwigara Nshimiyimana Diane ntafite imikono **600** isabwa y’abamushyigikira, afite **572**, kandi yifashishije amakarita y’itora ataragera kuri ban yirayo, mu mikono y’abamushyigikiye harimo abitabye Imana, yifashishije kandi inyandiko z’umutwe wa Politike PS-Imberakuri mu gukusanya imikono y’abamushyigikiye, ibi bikaba byerekana ko atari **indakemwa mu myifatire**.”

Bakimara gutangazwa, Ishyaka Democratic Green Party of Rwanda rya Frank Habineza ryahise ritangaza ko ryishimiye ko kuva 2003 ku nshuro ya mbere ishyaka ritavuga rumwe na Leta rigiye guhatana mu matora y’umukuru w’igihugu.

Philippe Mpayimana we yatangaje ko afite ikiganiro n’abanyamakuru aho ari mu Bufaransa, ndetse biteganyijwe ko nagera no mu Rwanda nabwo azagira ikiganiro n’abanyamakuru.

Ku ruhande rw’abatemerewe kwiyamamaza, Barafinda S. Fred we yatangarije Umuseke ko kuba atari mu baziyamamaza Abanyarwanda bahombye byinshi yariho abateganyiriza.



Perezida wa Komisiyo y’amatora atangaza ibyo inama y’abakomiseri yemeje kuri batandatu bifuzaga kuba abakandida

Komisiyo y’amatora yakemanze **ubunyangamugayo** bwa Diane Rwigara ngo wakoresheje indangamuntu z’abantu bapfuye mu kuzuza iriya mikono 600

Venuste KAMANZI
UMUSEKE.RW